

【放學歸屋下个路項】邱一帆原作

放學歸屋下个路項，你還記得幾多个風景？你還記得幾多个人情？

還記得有一頭羅漢松，高高大大，企在校門脣，該係偈上課、放學時節定著會對脣口經過、看著个大樹。春天到來，一群黃黃个揚蝶仔，會在樹頂高个花葉之間，飛上飛下，黏花採蜜；避暑，阿浩仔跋上樹頂高做起報音員，實況轉播大南埔對小南埔个野球比賽，輸个該隊，會在烈烈个日頭下，等操場走到汗流脈落。

離開吔羅漢松樹，跔等就愛離開校門，行轉屋下个路項。校門左手析係行去大南埔个方向，右手片係行去小南埔个路，校門正對面係學校先生个宿舍。宿舍係日本時代就起个木造屋，兩排齊齊正正个屋仔，看起來蓋爽快，在中幾頭仔木麻黃，同宿舍抵到涼爽涼爽。小學生个偈，毋敢行兼去看，驚怕堵著先生無就先生娘，賺罵就有——仰會放學還毋歸屋下，在這探麼个？毋過，偈識影著歇在頭間个外省先生，專心寫等水筆字，靚靚个白紙烏字，飛到吾目珠窟，到今還深深刻啊偈个心肝肚。這下，日本宿舍既經拆核，水筆先生乜已經過身歸天國，淨留下一個紅毛泥打个停車場，輒常空空無半臺車仔停在

該，實在係孤栖^①！

幹轉正手片，係一長段下崎。正愛下崎个左手片，企等一排大紅花樹。紅啾啾个大紅花，係講好鬧个細阿妹仔路過，摘一蕊下來，插啊耳公脣，就像係一位靚靚个新娘。捲捲个大紅花葉裡背，輒常屏等青蟲仔，童年个偈蠻皮手賤，看啊著該捲葉，就會一皮一皮同佢摘下來，打開捲葉、扭起蟲仔，餵分禾鸚仔^②食。大紅花，領等偈等，行轉屋下，行轉童年。

下崎个路脣左手析，有一戶人家，主人安到學老伯，看這莊項人同佢安个名仔就知，佢本旦係學老人，搬到客家莊來歇。佢蓋壁，對竹筒破做篾骨，對篾仔編做畚箕、毛籬、菜籃抑係籬籬、米籬，佢項項都通，樣樣都會。偈識看過學老伯又粗又貴个手巴掌，無想著佢編出來个東西恁靚恁幼秀！毋知幾多年前，佢走歸長山去賣鴨卵，子女也離開莊項吔，屋仔蓋久無人歇，看著該芒花抵屋、弄撞絲榮^③，腦海肚浮起一幅荒涼个情景。

放學歸屋下个路項，你還記得幾多个人情、風景？恁想起來還有盡多盡多，乜有盡多盡多个毋盼得。

① 係：音 hi；很、非常。

② 禾鸚仔：音 lo˥˩ bid˥˩ e˥˩；麻雀。

③ 弄撞絲榮：音 lung˥˩ dung˥˩ xi˥˩ iung˥˩；形容物品胡亂放置，沒有收拾。